

Misteri i Vajimit (Efqelia)



Misteri i Vajimit është një akt i shenjtë, në të cilin ndërsa trupi lyhet me vaj, hiri i Perëndisë thirret të zbresë në personin e sëmurë. Ai kryhet nga disa priftërinj, idealja është shtatë, por mund të kryhet edhe nga një numër më i vogël dhe madje edhe vetëm nga një prift.

Institucioni Hyjnor i Misterit. Edhe në Dhiatën e Vjetër vaji simbolizonte hir, gëzim dhe një prurje në jetë. Lyerja e të sëmurit me vaj bëhej nga apostujt siç lexojmë në Ungjillin e Shën Markut (6:13). Ata lyenin me vaj shumë të sëmurë edhe i shëronin. Dëshmia më e qartë e Misterit të Vajimit (Efqelia) gjendet në letrën e Apostullit Jakov (5:14-15). Është i sëmurë ndonjë ndër ju? Le të thërrasë pleqtë e kishës (presbiterët), dhe le të luten ata mbi të, e le ta lyejnë me vaj në emrin e Zotit. Edhe urata që është me besë do ta shpëtojë atë që lëngon, edhe Zoti do ta ngrerë atë; edhe në pastë bërë faje, do t'i falen. Apostulli nuk flet këtu për ndonjë “dhuratë” të veçantë shërimi, por përshkruan aktin e shenjtë në një formë të përcaktuar mirë, që do të hynte në praktikën e Kishës: kryerja e të cilit bëhej nga presbiterët e Kishës, me lutje, lyerje dhe vaj; dhe apostulli shton që kemi si pasojë lehtësimin e trupit dhe faljen e mëkateve. Dhe pikërisht Misteri këtë kishte për qëllim, shërimin e trupit dhe faljen e mëkateve.

Nuk do ishte një kuptim serioz i fjalëve të apostullit Jakov rreth lyerjes me vaj, si referim për një metodë të zakonshme shërimi të asaj kohe, sepse vaji, me gjithë atributet e tij të dobishme, nuk është një mjet shërimi për çdo sëmundje. Apostujt nuk sollën asgjë nga vetvetja, por ata mësuuan vetëm atë që Zoti Jisu Krisht i kishte

porositur ata, dhe çfarë Shpirti i Shenjtë iu kishte frymëzuar; dhe ata e quajtën vetveten jo “themeluesit” e Mistereve të Perëndisë, por vetëm “kujdestarë” të Mistereve dhe “shërbëtorë” të Krishtit”. Prandaj edhe vajimi, i cili urdhërohet nga Apostull Jakovi, ka një themelim Hyjnor.

Praktikimi në Kishën e hershme. Në shkrimet e vjetra të krishtera mund të gjenden dëshmi indirekte për Misterin e Vajimit tek Shën Irineu i Lionit dhe tek Origjeni. Më vonë kemi dëshmi të qarta tek Shën Vasili i Madh dhe tek Shën Joan Gojarti të cilët lanë lutjet për shërimin e të sëmurëve, të cilat hynë më vonë në ritin e Efqlisë. Të njëjtat dëshmi kemi edhe nga shën Qirilli i Aleksandrisë. Në shekullin e pestë papa Inocenti I i përgjigjej një sërë pyetjeve në lidhje me Misterin e Vajimit, duke treguar në përgjigjet e tij se: a) duhet të kryhet “mbi besimtarët që janë sëmurë”; b) mund të kryhet gjithashtu nga një peshkop. Nuk duhet parë në fjalët e apostullit, “le të thërrasë ai pleqtë e Kishës (prisbiterët)...”, ndonjë ndalim për pjesëmarrjen në aktin e shenjtë të ndonjë peshkopi; c) ky vajim nuk duhet të kryhet “tek ata që janë nën një pendim kishtar”, sepse është një “Mister”, dhe atyre që u janë ndaluar Misteret e tjera, si mund t’u lejohet ky?

Ç’është vajimi i shenjtë. Vajimi i shenjtë është një Mister i Kishës nëpërmjet të cilit fuqia shëruese e Jisuit jepet tek ne sot. Shenja e dukshme është Lyerja me vaj. Gjithmonë i përdorur për shërim në botën antike, vaji i bekuar nga Shpirti i Shenjtë na sjell hirin shërues të Perëndisë. Kur ne afrohemi që të lyhemi me këtë vaj të shenjtëruar, ne sjellim me vete “lutjen plot besë”, d.m.th. një besë të gjallë personale, që kur ne të lyhemi me këtë vaj, dora e Krishtit do të na prekë me fuqinë e tij shëruese. Perëndia na flet në këtë Mister me 14 pjesë nga Shkrimi i Shenjtë (shtatë nga Letrat dhe shtatë nga Ungjijtë). Ai na flet për të rritur besën tonë në fuqinë e Tij për të shëruar. Fakti që prania e shtatë priftërinjve rekomandohet (por jo e kërkuar) për celebrimin e këtij misteri i tregon besës sonë se tërë Kisha është e pranishme dhe po lutet për personin e sëmurë së bashku me të afërmit e miqtë.

Nëpërmjet Misterit të Vajimit, çdo Kishë bëhet një shenjtërore e mbushur me lutjet e klerikëve dhe besnikëve, dhe e shenjtëruar nga prania e Shpirtit të Shenjtë. Të krishterët orthodhoksë kurrë nuk i kanë lënë njerëzit e sëmurë vetëm tek ilaçet dhe mjekimet. Mjekimet dhe kirurgjia janë të mira; Perëndia i ka dhënë këto mënyra. Por si shtesë tek këto, ai na ka dhënë gjithashtu lutjen dhe Misterin e Vajimit. Perëndia kujdeset kur ne jemi të sëmurë. Sëmundja nuk do të thotë se Perëndia po na dënon. Sëmundja është ashtu siç shiu që bie “mbi të drejtët dhe të padrejtët”. Shpesh sëmundja është një bekim i maskuar. Na jep kohën dhe mundësinë të mendojmë se krijimi i mirë i Perëndisë është prishur, shtrembëruar nga mëkati i njeriut. Na ndërgjegjëson dhe na e bën të pranishme gjendjen aktuale të njeriut – ndarjen nga Perëndia. Por duhet kuptuar se sëmundja nuk është qëllimi i Perëndisë.

Jisui e shikonte sëmundjen si një armik. Ajo na kujton se ne jemi nën tiraninë e natyrës së rënë dhe duhet hiri i Zotit që të shërohem shpirtërisht dhe trupërisht. Në ungjillin e shën Llukës (13:16) thuhet për gruan që Krishti e shëroi “të cilën e pat lidhur Satanai për 18 vjet”. Nuk thuhet se Perëndia e kishte lidhur me sëmundje, por Satanai. Nëse vuajtja do ishte nga vullneti i Perëndisë, atëherë përse ai do na jepte Misterin e Vajimit për shërimin e sëmundjeve? Perëndia është në anën e shërimit, jo të sëmundjes. Por ai e lejon shpesh atë për të mirën tonë, duke e kthyer qëllimin e lig të Satanait për të na dëmtuar e vrarë, në shërim e në jetë. Për këtë arsye Apostulli thotë: “Dhe lutja me besë do e shpëtojë të sëmurin”... Ai përdor fjalën “shpëtoi”, në vend të fjalës “shëroi”. Në këtë pjesë ne i shohim fjalët “shërim”, “falje” dhe “shpëtim” të përdorura në vend të njëra-tjetrës. Kisha Orthodhokse e ka parë gjithmonë shpëtimin nën frymën e Ungjillit, duke mos patur asgjë juridike në të. Nuk është vendimi i ndonjë gjykate, por Jisui Shpëtimtari është “shëruesi hyjnor”, “burimi i shëndetit”, sipas fjalëve të Nikolla Kabasilas, i cili thotë “nuk janë të shëndoshët që kanë nevojë për doktorin, por të sëmurët: “besa juaj ju shëroi” ose “besa jote të shpëtoi” janë sinonime. Duke patur këtë koncept terapeutik të shpëtimit, mister i Pendim-Rrëfimit është parë si një “medikament klinik” dhe Kungata si “medikament i përjetësisë”.

Sëmundja mund t'i çojë njerëzit në panik dhe dëshpërim, por gjithashtu mund t'i çojë tek besa. Dhe nëse, nga sëmundja dikush vjen tek besa, atëherë besa e çon në shpëtimin dhe shërimin. Duke folur për këtë aspekt të Vajimit. Atë John Meyendorff shkruan: “Shërimi kërkohet vetëm në suazën e pendimit dhe shpëtimit shpirtëror, dhe jo si një qëllim në vetvete. Çfarëdo që të jetë sëmundja apo pasoja e saj, Vajimi simbolizon faljen hyjnore dhe çlirimin nga rrethi vicioz i mëkatit, vuajtjes dhe vdekjes, në të cilin njerëzimi i rënë është zënë rob. Me dhembshuri për vuajtjen njerëzore, të mbledhur së bashku për t'u lutur për anëtarin e saj të sëmurë. Kisha nëpërmjet priftërinjve të saj kërkon lehtësimin, faljen dhe lirinë e përjetshme. Ky është kuptimi i Vajimit të Shenjtë”.

Sipas fjalëve të Shën Jakovit dy gjëra janë të nevojshme për Misterin e Vajimit: 1) lyerja me vaj në emrin e Zotit dhe 2) lutja plot me besë. Gjatë gjithë kohëve qysh prej lashtësisë vaji është parë për këtë fuqi terapeutike. Krishti vetë tregon se si vera e vaji u përdorën për të shëruar plagët e Samaritanit të Mirë. Vaji është përdorur në Misterin e Vajimit si një shenjë e jashtme për të treguar fuqinë shëruese të Perëndisë dhënë tek besimtari. Por si në çdo mister efektshmëria varet në një gradë të madhe nga dispozicioni i brendshëm i besimtarit. Misteret nuk kanë fuqi magjike; konceptimi magjik është në kundërshtim me frymën e ungjillit dhe me frymën e mistereve. Perëndia e ka bërë njeriun qenie të lirë, hiri nuk e dhunon lirinë e njeriut, prandaj kërkohet “lutja plot me besë”, sa më shumë besë të kemi aq më shumë fuqi shëruese Zoti derdh mbi të. Çdo Mister është një takim personal

me Jisuin sot – po aq personal sa e kishin njerëzit që takonin Jisuin në ungjill. Kështu ne duhet t'i afrohem Jisuit në këtë mister si gruaja e sëmure në Ungjill. Nëse mbas kryerjes së Misterit shërimi nuk vjen, ne nuk duhet të dëshpërohemi, po të vazhdojmë të besojmë në dashurinë e pafund të Perëndisë sepse Ai mund të përdorë madje edhe sëmundjen për të mirën tonë nëpërmjet rrugëve të Tij të mistershme.

Kryerja e Misterit. Ky Mister kryhet për të sëmurët, të cilët janë në gjendje ta marrin në mënyrë të vetëdijshme dhe të marrin pjesë në lutje për vetveten; por megjithatë mund të kryhet edhe për fëmijë. Vendi për këtë akt të shenjtë mund të jetë kisha ose shtëpia ku banon i sëmuri. Misteri i Vajimit të Shenjtë (Efqelia) paraprihet zakonisht nga një Rrëfim dhe mbaron zakonisht me Misterin e Kungimit. Ana e dukshme e Misterit përbëhet nga shtatë lyerje me vaj të personit të sëmure, me radhë nga priftërinjtë pjesëmarrës. Kjo bëhet në formën e kryqit në ballë, vrimat e hundës, faqet, buzët, kraharori, në të dy anët e duarve, dhe duke i shoqëruar me lutje dhe me lexime nga pjesë të veçanta të Apostullit dhe Ungjillit. Gjatë lyerjes, shtatë herë thuhet kjo lutje: “At i Shenjtë, Shërues i shpirtave dhe trupave, që dërgove Birin Tënd të Vetëmlindur, Zotin tonë Jisu Krisht, i Cili shëron çdo sëmundje dhe çliron prej vdekjes: Shëro gjithashtu shërbëtorin Tënd (aksh)”.

Riti i Vajimit të Shenjtë fillon me këndimin e një tropari dhe një kanoni; lutja përfundimtare në rit është një lutje për faljen e mëkateve. Një asamble e tërë e shërbëtorëve të Zotit qëndron para Tij në emër të personit të sëmure, dhe me anë të lutjeve plot besë në emër të gjithë Kishës i lutet Atij, të Plotëmëshirshmit, t'i japi të sëmurit faljen e fajeve dhe ta pastrojë ndërgjegjen e tij nga çdo ndyrësi. Duhet patur gjithashtu ndër mend fakti që një person i cili është dobësuar shumë në trup dhe në shpirt nga sëmundja nuk mund të jetë gjithmonë në gjendje për të bërë rrëfimin e duhur të mëkateve. Lehtësimi i ndërgegjes së atij që merr Misterin e Vajimit të Shenjtë hap rrugën gjithashtu për një shërim hirdhënës të sëmundjes trupore nëpërmjet lutjes plot besë.

Është lejuar edhe gjithashtu praktikuar ndonjëherë një rit i veçantë Vajimi, i cili kryhet në kishë për shumë persona në të njëjtën kohë, në një ditë të veçantë të caktuar për këtë, për shërimin e përgjithshëm të shpirtit dhe trupit; por ky rit nuk është krejtësisht identik me Misterin e Vajimit të Shenjtë. Në këtë rit të kryer në mbrëmjen e së Mërkurës së Madhe, si për t'u përgatitur për vdekjen dhe varrimin e Zotit, të gjithë të pranishmit afrohen të lyhen një e nga të shtatë (ose më pak) priftërinjtë. Riti është identik me atë të Misterit të Vajimit, përveçse nëse janë shumë njerëz (dhe shtatë priftërinj), lyerja mund të kryhet për të gjithë në fund të shërbesës, dhe jo mbas çdo leximi të Ungjillit. Lyerja shoqërohet nga refreni i përsëritur me një melodi të veçantë dhe në harmoni me periudhën e kreshmës: “O Zot dëgjona; dëgjona o Kryezot, O i Shenjtë dëgjona”.

Vajimi tek Protestantet dhe Katolikët Romanë: Protestantët e kanë hequr Misterin e Vajimit, ndonëse Luteri, të paktën në fillim, nuk ishte kundra përdorimit të tij në kishë. Kisha Romane e jep Vajimin vetëm tek personat e sëmurë që janë gati duke vdekur, si një formë përgatitjeje për vdekjen, prandaj, dhe Misteri është quajtur tek Romano-Katolikët “Vajimi i Fundit”, Misteri i vdekjes. Një mësim i tillë u shfaq në Kishën Romano Katolike në fillim të shekullit 12, dhe është në kundërshtim me fjalët e apostullit Jakov. (Shënim: Sot Kisha Romano-Katolike, pas Konkilit II të Vatikanit, ofron këtë sakrament jo vetëm personave shumë pranë vdekjes, por edhe të moshuarve dhe personave tjerë që vuajnë nga ndonjë sëmundje e rëndë.)

Qysh prej kohëve të hershme në Kishë, atij që po vdiste i jepeshin, si përgatitje për vdekjen, Kungata e Shenjtë e Trupit dhe Gjakut të Krishtit. Kjo, natyrisht, nuk do të thotë se Misteri i Vajimit të Shenjtë nuk mund të kryhet tek ai që po vdes; ata që po vdesin nga një sëmundje e gjatë mund ta marrin Vajimin disa herë gjatë sëmundjes së tyre. Por, duhet patur parasysh se Misteri i Vajimit është një Mister i veçantë, për shërimin e të sëmurit, dhe nuk është një pjesë e nevojshme e riteve të kryera për atë që po vdes, të cilat zakonisht përfshijnë Rrëfimin, Kungimin dhe Lutjet për Daljen e Shpirtit (kur vdekja shihet se është afër). Nëse personi vdes, vaji i shenjtëruar i lënë për Vajimin e Shenjtë, sipas traditës së vjetër, hidhet në formë kryqi mbi trupin në arkivol, në mbarim të shërbesës së varrimit.

Misteri i Vajimi të Shenjtë ka një qëllim të dyfishtë: shërimin e trupit dhe faljen e mëkateve. Sepse nuk mund të jesh i sëmurë në trup pa patur shpirtin të turbulluar. Në këtë kuptim Misteri i Vajimit ka aspekt psikosomatik. Dihet se pjesa më e madhe e atyre që janë të sëmurë sot janë pikërisht nga shkakut i fajit, urrejtjes, armiqësisë, frikës dhe ankthit. Këto mendime të dëmshme në fillim kapin mendjen dhe pastaj shfaqen nëpërmjet dobësimit të trupit. Sepse njeriu është një unitet psikosomatik. Dhe nëse sëmundja vjen shpesh nëpërmjet mendjes dhe emocioneve, atëherë përse jo shërimi? Nëse mungesa e besës sjell sëmundje, atëherë përse besa nuk mund të sjellë shërim? Qëllim i dyfishtë i Misterit – shërim trupor dhe falje – dëshmon për unitetin e trupit dhe të shpirtit, ku nuk mund të bëhen dallime të qarta ndërmjet sëmundjeve shpirtërore dhe trupore. Misteri tregon konceptin e krishterë; duke e parë trupin si tempullin e Perëndisë dhe jo “burgun” e shpirtit.

Nga Mitropoliti i Korçës, + Hirësi Joani

[KISHA ORTHODHOKSE AUTOQEFALE E SHQIPËRISË FACEBOOK](#)